

Voces de Queempostela

Boletín Mensual
de Información

Nº22 MAIO 1998

Editado polo
C.G.C.

Galiza

Direitos laborais d@s homosexuais

Co gallo do 1º de Maio, dia internacional do traballo, o Colectivo Gai de Compostela dirixiu-se á sociedade, e en especial aos sindicatos, para chamar a atención sobre a difícil situación laboral de moitos gais e lesbianas. En concreto, o CGC fixo fincapé na discriminación que sufren as parellas dos traballadores e traballadoras homosexuais a respecto das heterosexuais, sobre todo das casadas. Nos seus comunicados o CGC tamén falou das grandes dificultades que teñen as persoas transexuais e travestis á hora de atoparen emprego. O CGC abre-se así ao diálogo cos sindicatos, animando-os a reclamar estas cuestións nas suas negociacións coas administracións e coa patronal.

Festa lésbica en Vigo

O pasado venres 22 de maio o colectivo lésbico BOGA organizou unha festa no coñecido pub de ambiente vígués "Plaff". Na festa, á que acudiron numerosas persoas, organizaron-se xogos e concursos. O BOGA cualifica, pois, de éxito esta primeira festa organizada por un colectivo homosexual na cidade olívica. Desde aquí esperamos que actos como este animen a creación dunha asociación homosexual en Vigo.

Parladoiro sobre os bairros gais

O pasado dia 13 de maio o CGC, dentro do seu ciclo anual de parladoiros no "Modus Vivendi", organizou un sobre o tema dos bairros gais. Ao redor de 12 persoas falaron sobre as vantaxes e os inconvenientes do xurdimento deste tipo de bairros, especialmente en Europa e na Península Ibérica.

Trofeu de mari-brilé

Xa está aberto o prazo de inscrición das equipas que quieran participar no 1º Trofeu de Mari-brilé "Eanes do Cotom", organizado polo CGC e o BOGA. Até o de agora xa se teñen inscrito no local do CGC sobre seis equipas. O CGC xa repartiu por todo Santiago folletos informativos coas regras do xogo. Ademais do local do CGC, as equipas tamén se poden apontar por correo electrónico ou no pub "Tarasca"; o prazo remata o vindeiro 10 de xuño. Os partidos do trofeu desenvolveránse durante a derradeira semana de xuño e a final xogará-se na mañá do dia 27 de xuño. O trofeu entregará-se á equipa gañadora na festa desa noite.

Actos do Dia do Orgullo e da Libertación

O CGC e mais o BOGA xa están a ultimar a preparación conjunta dos actos deste ano para a celebración do Dia do Orgullo e da Libertación Homosexual. En concreto, organizará-se un ciclo de videos homosexuais, un mariñón, un campionato de brilé, unha concentración reivindicativa, unha festa e un programa especial en Rádio Kalimero. Ambos os colectivos compostelans esperan sacar á rua un programa con todos os actos para meiados de xuño. Se queres información detallada do que se está a preparar ou tes ideas, pasa polo local nas horas de permanéncia, escribe ao apartado ou por correo electrónico, ou chama ao teléfono do BOGA.

Operación na estación de buses da Coruña

O pasado mes de maio a policía detivo sete persoas acusadas de inducir á prostitución a varios mozos menores de idade e con poucos medios económicos que frecuentaban a estación de autobuses da cidade da Coruña. Ademais de inducción á prostitución a menores, estas persoas están acusadas de chantaxear os clientes destes, todos homes, ameazando-os de revelar a sua identidade sexual. Esta operación policial ainda non está pechada e prosegue sen que a Delegación do Governo dé máis datos sobre os criterios e pasos que se están a seguir. Como era de esperar, algúns medios de comunicación e, en especial, traballadores e traballadoras da devandita estación non deixaron de relacionar os homosexuais que frecuentan a terminal coruñesa con estas presuntas actividades ilegais. Resulta incríbel, ou cando menos paradoxal, que a quiosqueira denúncie a presenza dos homosexuais na estación e logo expoña á venda numeroso material pornô gai. Dende o CGC fai-se un chamamento á sociedade, e en especial á administración, para que reflexione sobre o porqué da presenza de homosexuais nas estacións de buses e de trens, así como nos urinarios públicos. Notícias como esta, na que homosexuais son supuestamente ameazados e chantaxeados, deberían traducir-se nunha mudanza da política e da atenzón social cara a estas persoas, sen un lugar digno onde se relacionaren por mor da homofobia. Por outra banda, o CGC constata que eros de tratamento xornalístico, ao máis puro estilo "Arny", seguen a se producir sen os menores escrúpulos nalgún medio de comunicación.

Denegan a un gai a pensión de viuvedade

O pasado 27 de maio, o Xulgado do Social nº 15 de Madrid denegou-lle a pensión de viuvedade a Antonio Mata, o primeiro gai que reclamaba no Estado Español esta pretación por via xudicial. O xuíz considera que Mata e o seu defunto compañoero constituían unha unión de feito desde había máis de 18 anos. Sen embargo, o tribunal declarou que, mentres non se aproba unha lei que lle conceda ás uniós de homosexuais os mesmos direitos que ao matrimonio, os conviventes non teñen direito á pensión de viuvedade. O avogado de Mata terá, daquela, que apresentar un recurso baseado no paroxiso de que ao seu cliente se lle pida un requisito que non pode cumplir: o casamento.



Prepara-se o "Pride" en Portugal

A ILGA-Portugal xa está a preparar os actos do Dia do Orgullo ou "Pride" en Lisboa. A festa do "Arraial-Pride" celebrará-se o 27 de xuño a partir das 20 horas no Xardin do Príncipe Real. Hogano, a asociación homosexual portuguesa ten preparado, ademais da festa, un programa cultural paralelo cunha exposición de artes plásticas, unha sesión de poesía e unha exhibición de diapositivas sobre o homoerotismo. A organización espera superar a afluéncia da pasada edición, máis de 2.000 persoas.

Voda simbólica en Uviéu

O dia 9 de maio un concelleiro de Esquerda Unida casou en Uviéu dous homes nun acto simbólico, xa que ainda está sen aprobar unha lei de parellas para gais e lesbianas. Os noivos quixeron fazer público este acto para chamar a atención da sociedade sobre a situación de discriminación que viven as parellas homosexuais e para animar a súa visibilidade. Na voda falou o concelleiro e un representante da asociación homosexual Xente Gai Astur. O alcalde de Uviéu escusou por escrito a sua presenza no acto.

A Seguridade Social recoñece unha parella

En maio pasado unha lesbiana de Madrid conseguiu que a Seguridade Social recoñecese a sua parella como beneficiaria da sua tarxeta sanitaria. Esta parella, inscrita no rexistro de parellas madrileño, leva dous anos convivendo. Por lei, a Seguridade Social concede-lle este beneficio ao/á cónxuge, irmáns ou irmás, pais e nais, descendencia ou a quem acrede que convive co ou coa titular da tarxeta en situación análoga ao matrimonio desde ao menos un ano. Así o interpretou, pois, a institución sanitaria a respecto desta parella de lesbianas. Isto supón un paso máis na lenta equiparación dos direitos das parellas homosexuais aos das heterosexuais.

Apoio para a prevención ao VIH en Portugal

O pasado mes de abril a ministra portuguesa de saúde aprobou unha subvención que, através da Comissão Nacional de Luta Contra a Sida, apoiará unha campaña de prevención ao contáxio do VIH organizada pola ILGA-Portugal. Así, en breve, a asociación portuguesa comenzará a distribuir kits de preservativos por establecimentos gais de Lisboa, Porto e do Algarve, que disporán de suportes para a colocación material en lugares estratégicos.

Festival de Cinema de Lisboa

O Ministerio de Cultura portugués, através do Instituto do Cinema, concedeu unha subvención de dous millóns de escudos para a organización da segunda edición do Festival de Cinema Gai e Lésbico de Lisboa, que se celebrará entre os días 12 e 27 do vindeiro mes de setembro. O Concello de Lisboa tamén apoia a vindeira edición deste festival coa cesión de salas e unha subvención de seis millóns de escudos. Por outra banda, o director do festival, Celso Júnior estivo xa na pasada edición do Festival de Berlin para promocionar o festival lisboeta e logo no Brasil na procura de fitas en lingua portuguesa.



Alemaña pede perdón aos gais

O parlamento alemán, o Bundestag, aprobou a finais de maio unha resolución na que se pide perdón a todas aquelas persoas levadas á cadea baixo o goberno nazi por mor das leis inxustas do III Reich. Esta resolución de perdón inclúe os gais encarcerados ou enviados a campos de concentración, ainda que as máis destas vítimas xa están mortas. A inclusión dos gais nesta resolución debeu-se a unha moción presentada polos Verdes e o SPD, o partido social-demócrata. Así e todo, as persoas rehabilitadas por esta resolución -entre unhas 350.000 e 500.000- ou as suas familias e/ou parellas non recibirán compensación material nengunha.



Campaña contra a "Section 28" no Reino Unido

Várias asociacións homosexuais británicas, entre elas OutRage, iniciaron unha campaña para pedir-lle ao goberno laborista que cumpra a sua promesa eleitoral de derogar a famosa "Section 28". Trata-se dunha disposición gubernamental dictada hai xa dez anos pola que se proíbe toda información sobre homosexualidade nas escolas, institutos e meios de comunicación dirixidos á infancia ou á adolescencia. As asociacións homosexuais británicas reclaman unha información positiva sobre o feito homosexual nos centros de ensino para combater a homofobia e asegurar o benestar dos gais e lesbianas adolescentes. Por outra banda, a asociación Stonewall iniciou tamén unha campaña para pedir a equiparación da idade do consentimento para as relacións homosexuais á dos heterosexuais -en 16 anos-. Aproveitando a celebración do festival de Eurovisión no Reino Unido, Stonewall lanzou esta campaña co lema "Size Does Matter" (O tamaño si que importa).

Nova Escócia concede pensións de viuvedade

O goberno federal da provincia canadense de Nova Escócia -na costa atlántica- decidiu conceder-lles pensións de viuvedade ás parellas dos traballadores gais e lesbianas finados. Esta disposición tamén se estende para as parellas dos traballadores e traballadoras heterosexuais non casadas. A decisión do goberno de Nova Escócia entrará en vigor a partir do vindeiro 1 de xullo.

Chipre deroga a prohibición da sodomia

O pasado 21 de maio o parlamento de Chipre, tras as presións do Consello de Europa, votou a derogación da lei que criminalizaba os actos homosexuais, mesmo en privado e entre persoas adultas. A derogación aprobouse coa forte oposición da Igrexa Ortodoxa que recadou máis de 40.000 sinaturas pedindo o bloqueo da reforma.

Dana Internacional gaña Eurovisión

A representante de Israel, Dana Internacional, gañou o pasado 9 de maio a edición do festival de Eurovisión. É a primeira vez que unha persoa transexual gaña un premio internacional destas características. A canción gañadora, "Diva", xa se está a bailar en moitos clubes gais de Europa, e mesmo en Compostela! Dana Internacional acudira ao festival de Eurovisión abeirada polo seu éxito en Israel e en países veciños como Exipto, onde os seus discos -proibidos polo goberno- se venden no mercado negro. Máis de 600 millóns de persoas seguiron hogano a 43ª edición do festival, especialmente seguido pola comunidade homosexual en toda Europa. En Israel, que non gañaba Eurovisión desde había anos, e para disgusto dos sectores conservadores, a victoria de Dana Internacional foi celebrada sobretodo por gais, lesbianas e transexuais. Agora Dana Internacional está xa a preparar o seu disco de lanzamento en Europa con mixes de anteriores éxitos e de cancións folk de diferentes tradicións. Ademais, a artista israelita xa recibiu a oferta de cantar na cerimónia de apertura dos Gay Games en Amsterdam para xullo deste ano.

Sentenza para George Michael

O coñecido cantante británico de orixe grega, George Michael, foi xulgado o pasado 14 de maio por escándalo público. George Michael fora detido a comezos de abril nuns baños públicos de Beverly Hills frecuentados por homosexuais. O cantante terá que pagar unha multa de 810 dólares, prestar 80 horas de servizos comunitarios e deberá asistir tamén a unhas sesións de consello psicolóxico sobre sexo!!!. Ademais, George Michael non poderá voltar aos devanditos baños públicos nem a zona verde de engate no que se situán.

Homosexuais en Wall Street

Hai unhas semanas comezou a funcionar na bolsa de Nova York o Gay Financial Network, un servizo de investimento por internet para os gais e lésbicas dos EUU. O GFN xa ten máis de 6.000 consultas por semana para investir en bolsa ou para procurar asesoramento sobre propiedade de títulos e valores. Este servizo foi criado por Walter Schubert, o único membro da bolsa en Wall Street que está fóra do armario. O GFN quer acabar cos temores dos investidores gais e lesbianas que non se atreven a revelar a súa identidade sexual aos seus corredores de bolsa.

Anuncios de Balde

Vivenda

Busco compañeiro para compartir piso en Santiago, zona vella, norte ou leste. Todo o ano e a partir de xa. Estudiante ou traballador, que sexa ordenado, enrollado e afable. Góstame o cine, a música non machucona e o sendeirismo. Teléfono de contacto: 970-51-62-86.

Contactos

Busco un home para amizade e o que veña logo. O físico non é o más importante, pero si a honestidade e a sinceridade. Zona de Galicia. Eu teño 32 anos, son moreno, ollos castaños, 1'61 m., corpo xeneroso. Amais de ser pasivo a tope, gusto de cocinar e das plantas, pero tamén me gusta ir de marcha. Busco e dou cariño e comprensión. Absterse bromistas ou curiosos. Escríbeme á Rúa Belvís nº7 baixo, 15703 Compostela

Me llamo José, vivo en Madrid, 36 años, 1'70 m., 60 kg., Interesado en: música, cine, historia, idiomas, naturaleza. Me gustaría contactar gente 27-42, con intereses similares. Jose, Apdo. 50205, 28080 Madrid.

Soy Lucía, tengo 18 años, piel blanca, pelo negro, ojos pardos, 1'65 de estatura. Deseo correspondencia con personas de todo el mundo. Dirección: Lucía Loria González/C. Central km.12 #11801/CP 19180 C.Habana /Cuba. Tf: 91-40-60.

Carlos. 39 años, 1'70 m., 75 kg., moreno, ojos azules, pelo corto, sano y discreto. Busco tío entre 22 y 40 años, simpático y tierno para amistad y SSR. Abierto a sugerencias. Sólo gente sana y discreta. Apartado de correos 2093 / 15780 Compostela.

Lembra anunciar-te nesta sección do Voces de Queempostela c totalmente gratis. Non só podes por anuncios de contactos, tamén caben aquí mensaxes nas que se busca vivenda, intercambios, ofertas ou demandas de trabajo etc. Pode anunciar-se toda a persoa que o queira, non só homosexuais ou bisexuais. Só fes que enviar o texto (clarino) do teu anuncio por correo electrónico ou ao apartado de correos do CGC. Se queres tamén o puedes entregar en persoas no local do colectivo nas horas de permanencias. Aníma-te!!

Asociacións homossexuais da Galiza

Colectivo Gai de Compostela

Local: Rua Entremuros, 16B, Baixo, Compostela.
Permanencias, luns, mércores, xoves e venres de 20:30 a 21 horas. Reunión semanal, martes ás 20:30 horas.
Correo: Apdo. 191 / 15780 Compostela
Correo electrónico: gaiacompos@hotmail.com
Páxina Web: www.geocities.com/westhollywood/9463

BOGA - Colectivo de Lesbianas de Galicia

Correo: Apartado 2169 / 15780 Compostela
Correo electrónico: lesbicompos@hotmail.com
Teléfono: 919-34-67-53

Mil-Homes, Grupo Gai da Coruña

Correo: Apartado 24 / 15080 A Coruña

GALEGA (Gais e Lesbianas de Galicia)

Correo: Apartado 665 / 27001 Lugo
Teléfono: (982) 24-45-60, extensión 1

Libertaçom Homossexual

Correo: Apartado 343 / 32080 Ourense

